

Jose Antonio ajak UMS teroka sumber di Timor Leste

UB 5-10-13 AS

KOTA KINABALU: Universiti Malaysia Sabah (UMS) menerima kunjungan hormat dari Duta Besar Republik Demokratik Timor Leste ke Malaysia, HE Jose Antonio Amorim Dias kelmarin.

Kunjungan yang memfokuskan kerjasama dua hala dalam bidang akademik bagi membolehkan para kakitangan akademik UMS meneroka sumber yang terdapat di Timor Leste itu menjadi intipati penting dalam

lawatan berkenaan. Jose Antonio berkata bidang seperti hubungan antarabangsa berpotensi untuk dijadikan bahan penyelidikan oleh kedua-dua pihak memandangkan pengalaman jerit perit negara itu sendiri dalam mencapai kemerdekaan dan ketika menyertai ASEAN.

"Timor Leste sedang menuju ke arah memacu pembangunan ekonomi melalui peningkatan dalam bidang pendidikan dan infrastruktur. Justeru, kerjasama antara kedua-dua pihak mampu membantu aspirasi kami dalam membangunkan ekonomi negara," katanya.

Beliau berkata demikian di hadapan lebih 150 pelajar UMS dalam satu majlis bersempena lawatan kerja beliau ke UMS.

Dengan sumber kekayaan minyak dan gas di Timor Leste, beliau mengalu-alukan kerjasama dari UMS khususnya untuk menjalankan penyelidikan dan pertukaran teknologi oleh kedua-dua

pihak, memandangkan Timor Leste masih kekurangan kepakaran dan teknologi dalam bidang itu.

Beliau turut mengalu-alukan pelabur dari Malaysia untuk menjalankan perniagaan di Timor Leste. Antara perniagaan yang disebut berpotensi untuk pelaburan adalah bidang pertanian terutamanya penanaman kelapa sawit, penerokaan kayu jati, cari gali minyak, gas dan sebagainya.

Dalam pada itu, Naib Canselor UMS, Prof Datuk Dr Mohd Harun Abdullah berkata UMS bersedia untuk menjalinkan kerjasama dua hala dengan institusi pendidikan dan agensi kerajaan dari negara itu.

Katanya, kerjasama ini merupakan satu peluang yang harus diraih dan direbut oleh kakitangan akademik dan pelajar UMS bagi menjana ilmu dalam konteks sumber modal insan.



HARUN menyampaikan cendera-menganan kepada Jose Antonio sempena lawatan kerja beliau ke UMS.